



Broj/Број: 01/2a-50-1-2-39/09
Sarajevo/Сарајево, 5.3.2009. godine

ZAPISNIK
39. sjednice Komisije za vanjske poslove
Predstavničkog doma Parlamentarne skupštine BiH,
održane 3.3. 2009.

Sjednica Komisije počela je u 15 sati. Sjednici su prisustvovali: Slavko Matić, Milica Marković, Azra Alajbegović, Husein Nanić, Sadik Ahmetović i Sefer Halilović. Sjednici nisu prisustvovali Azra Hadžiahmetović, Milorad Živković i Denis Bećirović.

Osim članova Komisije, sjednici su prisustvovali i Draženka Malićbegović i Dragana Dilber iz Ministarstva civilnih poslova BiH, Midhat Salić iz Ministarstva vanjske trgovine i ekonomskih odnosa BiH, Brane Janković iz Ministarstva odbrane BiH, te Zoran Perković i Miloš Prica iz Ministarstva vanjskih poslova BiH.

Zapisnik su vodili Merdžana Iglica, sekretar Komisije za vanjske poslove, i Miroslav Stanišić, stručni saradnik.

Za sjednicu Komisije jednoglasno je usvojen sljedeći

DNEVNI RED

1. Usvajanje Zapisnika 38. sjednice Komisije;
2. Davanje mišljenja o saglasnosti za ratificiranje:
 - a) Bilateralnog sporazuma u oblasti obrazovanja između Vijeća ministara BiH i Vlade Crne Gore (resorno ministarstvo: Ministarstvo civilnih poslova BiH);
 - b) Memoranduma o razumijevanju o budućnosti zdravstvene mreže u Jugoistočnoj Evropi u okviru Procesu regionalne saradnje u Jugoistočnoj Evropi (resorno ministarstvo: Ministarstvo civilnih poslova BiH);
 - c) Sporazuma o preferencijalnoj trgovini između Bosne i Hercegovine i Islamske Republike Iran (resorno ministarstvo: Ministarstvo vanjske trgovine i ekonomskih odnosa BiH);
 - d) Sporazuma o vojnom grantu između Vijeća ministara BiH i Vlade Republike Turske (resorno ministarstvo: Ministarstvo odbrane BiH);
3. Davanje mišljenja o izvještaju o radu Ministarstva vanjskih poslova BiH (u okviru Izvještaja o radu Vijeća ministara BiH za 2008. godinu);

4. Davanje mišljenja o Informaciji o aktivnostima vezanim za prijem Bosne i Hercegovine u nestalno članstvo u Vijeću sigurnosti Ujedinjenih naroda (osnova za raspravu – informacija Ministarstva vanjskih poslova BiH: Aktivnosti vezane za prijem BiH u Vijeće sigurnosti UN-a, dostavljena PSBiH 17. 2. 2009.), kao i Informaciji o aktivnostima vezanim za prijem BiH u Vijeće sigurnosti Ujedinjenih naroda 2010.-2011. godine (osnova za raspravu: Plan rada Koordinacionog tima za vođenje kampanje za nestalno članstvo Bosne i Hercegovine u Vijeću sigurnosti 2010.- 2011. godine, dostavljen PSBiH 4.2.2009.), te na osnovu toga utvrđivanje prijedloga člana Koordinacionog tima u ime PSBiH za kandidaturu BiH u Vijeće sigurnosti UN-a;
5. Razmatranje Orijentacionog radnog plana Komisije za vanjske poslove u 2009. godini;
6. Izvještaji i materijali pristigli na Komisiju:
 - Zabilješka s drugog sastanka Koordinacionog tima za vođenje kampanje za članstvo BiH u Vijeću sigurnosti UN-a za period 2010. – 2011. godina, održanog 16. 2. 2009., (materijal MVP-a BiH);
 - Informacija o održavanju okruglog stola o proširenju vojno-političkih obaveza BiH u okviru UN-a i OSCE-a, Sarajevo, 11. i 12. 3. 2009. (materijal MVP-a BiH);
 - Informacija o planiranju posjete Grupe prijateljstva PSBiH Republici Sloveniji (materijal MVP-a BiH);
 - Informacija o posjeti generalnog konzula BiH Parlamentu Baden-Wuettemberga, (materijal MVP-a BiH);
 - Informacija o sastanku delegacije Narodne skupštine RS-a s predstavnicima Parlamenata Brisela i Flamanije (materijal MVP-a BiH);
 - Informacija o posjeti ministra vanjskih poslova Francuske Bernarda Kouchnera Bosni i Hercegovini, 9. i 10. 4. 2009. (materijal MVP-a BiH);
 - Dogovor o terminu i sastavu delegacije Komisije za vanjske poslove za uzvratnu posjetu Parlamentu Estonije.
7. Tekuća pitanja.

Ad.1. Usvajanje Zapisnika 38. sjednice Komisije

Nije bilo primjedbi i članovi Komisije jednoglasno su usvojili Zapisnik 38. sjednice Komisije za vanjske poslove.

Ad. 2. a) Davanje mišljenja o saglasnosti za ratificiranje Bilateralnog sporazuma u oblasti obrazovanja između Vijeća ministara BiH i Vlade Crne Gore

Dragana Dilber iz Ministarstva civilnih poslova BiH kazala je da ja crnogorska strana dostavila notu sporazuma 11.6.2007. Kompletna procedura provedena je u skladu sa zakonom o sklapanju međunarodnih ugovora. Nacrt sporazuma dostavljen je entitetskim ministarstvima obrazovanja i odjelu za obrazovanje Vlade Brčko Distrikta BiH na mišljenje od kojih smo dobili pozitivna mišljenja. Sporazum je potpisao Sredoje Nović, ministar civilnih poslova BiH, 1.12.2008.

Nije bilo rasprave i članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 2. b) Davanje mišljenja o saglasnosti za ratificiranje Memoranduma o razumijevanju o budućnosti zdravstvene mreže u Jugoistočnoj Evropi u okviru Procesu regionalne saradnje u Jugoistočnoj Evropi

Draženka Malićbegović iz Ministarstva civilnih poslova BiH kazala je da Memorandum o razumijevanju o budućnosti zdravstvene mreže u Jugoistočnoj Evropi predstavlja zajedničku inicijativu ministara zdravlja zemalja jugoistočne Evrope. Osnovni cilj ove zdravstvene mreže je unapređenje zdravlja ljudi u regionu jugoistočne Evrope. Ministarstvo civilnih poslova BiH pribavilo je pozitivno mišljenje nadležnih entitetskih institucija i uputilo Memorandum Vijeću ministara BiH. Na 48. sjednici Predsjedništva BiH, održanoj 26.11.2008., donesena je odluka o prihvatanju Memoranduma a ministar Sredoje Nović ovlašten je da ga potpiše.

Azra Alajbegović pitala je kako će se Memorandum prenijeti na entitetska ili kantonalna ministarstva.

Draženka Malićbegović kazala je da su u dokumentaciji Memoranduma uključeni i predstavnici entitetskih i kantonalnih ministarstava zdravlja te da su i oni članovi mreže za jugoistočnu Evropu. U stvari, ovo je nastavak aktivnosti koje su do sada vođene s tim da je sada potpisan Memorandum jer se žele unaprijediti određene aktivnosti i programi vezani za mentalno zdravlje u regionu jugoistočne Evrope.

Članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog memoranduma.

Ad. 2. c) Davanje mišljenja o saglasnosti za ratificiranje Sporazuma o preferencijalnoj trgovini između Bosne i Hercegovine i Islamske Republike Iran

Midhat Salić iz Ministarstva vanjske trgovine i ekonomskih odnosa BiH kazao je da je Sporazum potpisan u decembru 2008. godine i da je ovo prvi sporazum ovakve vrste koji je BiH potpisala s nekom državom. Razlog za potpisivanje ovog sporazuma je pravno uobličavanje privrednih odnosa između Islamske Republike Iran i Bosne i Hercegovine. BiH je u okviru SFRJ imala veliki udio u izvozu, privrednoj i trgovinskoj saradnji između SFRJ i Islamske Republike Iran. Međutim, od 90-ih godina ta robna razmjena drastično je opala. Na tržište Irana, koje je jako zanimljivo jer ima preko 70 miliona stanovnika, ušle su druge zemlje. Struktura izvoza koja je bila u bivšoj Jugoslavije zadržala se i sada i BiH ima interes da se probije na to tržište. Iran nije članica Svjetske trgovinske organizacije i bilateralno ugovaranje povoljnijeg tretmana za robu iz BiH je za sada jedini način preko Sporazuma o preferencijalnoj trgovini. Sastavni dio ovog sporazuma su aneksi a), b) i c). Aneksi a) i b) reguliraju robe na koje se odnose preferencijali, a aneks c) regulira pravila porijekla. Znači, samo robe koje imaju porijeklo jedne i druge strane mogu biti u ovom preferencijalnom tretmanu. U pregovorima je dogovoreno da to bude 170 vrsta roba i s jedne i s druge strane koje će dobiti povoljniji tretman. Sporazum je prošao sve faze o postupku zaključivanju međunarodnih ugovora.

Članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 2. d) Davanje mišljenja o saglasnosti za ratificiranje Sporazuma o vojnom grantu između Vijeća ministara BiH i Vlade Republike Turske

Brane Janković iz Ministarstva odbrane BiH kazao je da je kompletna procedura za zaključivanje ovog sporazuma provedena zaključno s odlukom Predsjedništva BiH da zamjenik ministra Igor Crnadak potpiše ovaj sporazum.

Članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 3. Davanje mišljenja o izvještaju o radu Ministarstva vanjskih poslova BiH (u okviru Izvještaja o radu Vijeća ministara BiH za 2008. godinu)

Slavko Matić je, s obzirom da sjednici ne prisustvuju ni ministar ni zamjenica ministra vanjskih poslova BiH, predložio da se prvo razgovara o tome hoćemo li uopće raspravljati o ovom izvještaju bez njihovog prisustva.

Husein Nanić kazao je da apsolutno ne želi da raspravlja o izvještaju bez prisustva ministra, i da bi bilo korisno da tu bude i zamjenik ministra vanjskih poslova.

Milica Marković podržala je raspravu o izvještaju bez obzira što sjednici ne prisustvuje ministar i zamjenica ministra. Dodala je da ima utisak da se ne dopušta da se otvori pitanje Ministarstva vanjskih poslova BiH na Komisiji za vanjske poslove. Izrazila je očekivanje da će Zoran Perković moći da odgovori na pitanja članova Komisije.

Slavko Matić pitao je da li se mi trebamo spuštati ispod određenog nivoa i kazao da očekuje da se na svakoj sjednici iz nekog ministarstva pojavi ili ministar ili zamjenik ministra. Zapitao se hoćemo li mi sebi dopustiti da jedino na našoj komisiji to ne bude tako. Dodao je da nema ništa protiv da se na sjednici raspravlja o izvještaju u prisustvu pomoćnika ako se o tome složimo.

Husein Nanić kazao je da daje negativnu ocjenu Ministarstvu vanjskih poslova BiH kao i da bi volio da je sjednici prisutan ministar i zamjenica da im to lično kaže. Dodao je da šest mjeseci ne može da dobije izvještaj o stanju u DKP mreži u elektronskoj formi.

Milica Marković rekla je da smo mi i ranije, u nekim drugim situacijama, slali pozive ministru i zamjenici ministra pa se nisu pojavili. Dodala je da ne želi da se veže za to hoće li se ministar udostojiti da dođe na sjednicu Komisije. Ponovila je da je za to da se na sjednici otvori rasprava o izvještaju o radu Ministarstva vanjskih poslova BiH i da mi kao komisija aktivno pristupimo onome što je na dnevnom redu sjednice.

Sadik Ahmetović kazao je da mi imamo problem kad je u pitanju vanjska politika, nemamo platforme, nemamo zakona. Dodao je da se većina nas fokusirala na pismo zamjenice ministra vanjskih poslova i ono što je ona ukazivala u tom pismu, što ne stoji u ovom izvještaju. U tom kontekstu kazao je da bismo mi vodili raspravu o stanju u Ministarstvu vanjskih poslova mimo ovog izvještaja što je problem ako nemamo prisustvo ministra ili zamjenice ministra. Rekao je da rad Ministarstva gleda kroz ostvarivanje vanjskopolitičkih ciljeva, tj. približavanje NATO-u i Evropskoj uniji.

Milica Marković istakla je da ne razumije da neko tačku dnevnog reda koju je jasno pročitao svodi na odnose ministra i zamjenice ministra vanjskih poslova. Personalni onosi u pogledu izvještaja o radu Ministarstva vanjskih poslova BiH potpuno su periferni u odnosu na ono šta mi imamo u materijalu u cijelom izvještaju Vijeća ministara BiH.

Azra Alajbegović kazala je da odnosi između ministra i zamjenice ministra vanjskih poslova nisu tema ni tačka dnevnog reda. Tačka dnevnog reda je Izvještaj o radu Ministarstva vanjskih poslova BiH. Zamolila je da se fokusiramo na izvještaj o radu Ministarstva s akcentom na ono šta je Ministarstvo uradilo i šta treba da uradi, da bi zemlje Evropske unije ratificirale Sporazum o pridruživanju. Dodala je da misli da su odnosi ministra i zamjenice u ovom trenutku sekundarne prirode. Oni jesu bitni u kapacitetu rada Ministarstva ali za budućnost naše zemlje i za odgovornost koju mi imamo pred građanima ove zemlje nisu. Prisustvo ministra i zamjenice bilo bi prilika da govorimo o jako puno problema koje imamo u radu Ministarstva vanjskih poslova BiH, dodala je Azra Alajbegović.

Slavko Matić predložio je da se odredimo da li ćemo o Izvještaju razgovarati samo iz razloga neprisustva ministra ili zamjenice.

"Za" prijedlog Huseina Nanića da se na sjednici ne raspravlja bez prisustva ministra i zamjenice bila su tri člana Komisije.

"Za" prijedlog Milice Marković da se na sjednici raspravlja o izvještaju bila su također tri člana Komisije.

Slavko Matić predložio je da se na sjednici ipak raspravlja o Izvještaju o radu Ministarstva vanjskih poslova BiH.

Predsjedavajući je dao riječ predstavniku Ministarstva koji je iznio obrazloženje izvještaja. Zatim je nastavljena rasprava članova Komisije.

Milica Marković kazala je da je pažljivo pročitala Izvještaj, ali da će se osvrnuti na neke dijelove. Navela je dio koji se odnosi na pripremu sporazuma i na korelaciju sa Predsjedništvom BiH u pogledu priprema i konsultacija za imenovanje kadrova u DKP. Kazala je da smatra da je Ministarstvo na ovom pitanju trebalo više uraditi. Ono što država i Parlamentarna skupština BiH očekuju od Ministarstva vanjskih poslova BiH jeste poboljšanje ukupnog imidža BiH u svijetu, a posebno u zemljama Evropske unije. Također se očekuje poboljšanje privrednih tokova i povećanje stranih ulaganja u privredu BiH, kako bi se osjetili efekti toga. Naglasila je da misli da Ministarstvo u ovom dijelu nije odgovorilo svom zadatku, čak da se čini da se u 2008. godini nije ni bavilo ovim pitanjima. Posebno se osvrnula na dio Izvještaja na 54. strani – gdje je rečeno da su aktivnosti Ministarstva bile zasnovane na planu, ali da je plan samo djelimično ostvaren. Zatražila je da se objasni zašto je plan samo djelimično realiziran.

Milica Marković posebno je naglasila da smo mi u domaćoj javnosti mogli da čujemo i primijetimo da su u 2008. godini bili izraženi problemi i primjedbe na rad Ministarstva, ali i na unutrašnje funkcioniranje Ministarstva. Dodala je da je i Komisija, ali i Parlament trebalo da se pozabavi ovim problemom, ali da je posebno Vijeće ministara BiH trebalo da se bavi tom problematikom, da pokuša da nađe način da se ti odnosi razriješe. Kazala je da smatra da je unutrašnja organizacija i način funkcioniranja Ministarstva vanjskih poslova BiH samo stvaralo lošu sliku o tom ministarstvu i lošu sliku o vanjskoj politici BiH u dijelu koji se odnosi na MVP.

Sadik Ahmetović rekao je da je vrlo teško ocjenjivati Izvještaj ako se nemaju određeni parametri, odnosno ciljevi vanjske politike, te da se ne bi moglo negativno

ocijeniti ono što je navedeno u Izvještaju. Dalje je rekao da u Izvještaju nema ništa o tome da je Ministarstvo reagiralo ili nešto preduzimalo u vezi s otvaranjem „ekonomskih“ predstavništava Republike Srpske u svijetu, što ne bi bilo sporno da se ona bave samo ekonomskim pitanjima, već se bave politikom, čak neki predstavnici daju političke ocjene o stanju u BiH i o ustavnom uređenju, što je nedavno bio slučaj u Jerusalemu, pa i pismo Vlade RS Vijeću sigurnosti Ujedinjenih nacija, rekao je, pored ostalog, Sadik Ahmetović. Dalje je dao akcenat na popunjavanje ambasada, te spomenuo Ambasadu BiH u Beogradu, rekavši da je to davno trebalo završiti. Također je rekao da je trebalo imenovati ambasadora BiH u Ujedinjenim narodima, što je veoma važna destinacija za Bosnu i Hercegovinu.

Sefer Halilović založio se da se razjasne nadležnosti Predsjedništva BiH i Ministarstva vanjskih poslova BiH, kao i to šta je stvar ove komisije.

Slavko Matić rekao je da nije spreman podržati Izvještaj o radu MVP iz više razloga, a da će pomenuti samo neke. Bez obzira što je dobar dio u nadležnosti Predsjedništva BiH kad su u pitanju kadrovi u DKP-u, materijalno stanje tiče se Ministarstva, ali da se i sam imao priliku uvjeriti da je stanje u diplomatsko-konzularnim predstavništvima izuzetno loše. Odnosi među ljudima su jako loši, isto kao i odnosi u Ministarstvu, odnosi ministra i zamjenice. Vrlo su česti paralelizmi, gotovo da se isključivo komunicira po nacionalnoj osnovi, i to svi znaju, godinama je tako, i o tome se šuti. Ni izbliza nisu iskorištene mogućnosti za ekonomsku diplomatiju i ogromna većina ljudi u DKP nisu stručni za taj posao, vjerovatno ni Ministarstvo u sjedištu nema takve ljude, ali je Ministarstvo bilo dužno iskoristiti našu Vanjskotrgovinsku komoru i Agenciju za promociju stranih investicija, zatražiti podatke i raditi na tome. Neshvatljivo je da se to ne radi kroz naše ambasade, pogotovo u zemljama koje su nam ekonomski interesantne, rekao je, uz ostalo, Slavko Matić. Dalje je rekao da ono što najviše zamjera Ministarstvu i ministru jeste što u zadnje dvije godine odnosi sa susjednim državama ne da se ne poboljšavaju, nego se stalno nešto komplicira. Vrlo često bez ikakvog pravog razloga, te da ne vidi da Ministarstvo radi na rješavanju nekih otvorenih pitanja ni s Hrvatskom, ni sa Srbijom, ni sa Crnom Gorom, već se ima utisak da se otvaraju neka nova. Dalje je rekao da je očekivao da će se u Izvještaju dobiti odgovor i u vezi s onim što je pisala zamjenica ministra Komisiji, međutim, toga nema. Očekivati je da dođu ovdje na sjednicu i da usmeno kažu o čemu se tu radi. Nije se čulo ni u javnosti ni na Komisiji da je ministar demantirao ono što je zamjenica pisala, niti da je potvrdio, rekao je Slavko Matić.

Poslije ovih rasprava članova Komisije govorio je ponovo predstavnik Ministarstva Zoran Perković.

Zatim je predsjedavajući prvo na glasanje dao prijedlog Azre Alajbegović - da Komisija da pozitivno mišljenje o Izvještaju o radu Ministarstva. Ovaj prijedlog dobio je jedan glas.

Zatim je predsjedavajući na glasanje dao prijedlog Milice Marković – da se za Izvještaj da negativna ocjena. Ovaj prijedlog dobio je dva glasa.

Predsjedavajući Matić je zatim iznio svoj prijedlog – da se Izvještaj vrati Ministarstvu vanjskih poslova BiH na doradu i dopunu na osnovu rasprave vođene na Komisiji i da se zatraži da, prilikom sljedeće rasprave, sjednici prisustvuje ministar ili zamjenica ministra.

”Za” ovaj prijedlog glasala su tri člana Komisije.

Predsjedavajući je konstatirao da je ovaj prijedlog dobio većinu glasova Komisije i **da se Izvještaj vraća Minsitarstvu na doradu i dopunu, s ocjenom da Izvještaj o radu Ministarstva vanjskih poslova BiH u 2008. godini nije cjelovit i da ga treba dopuniti na osnovu rasprave na Komisiji.**

Ad. 4. Davanje mišljenja o Informaciji o aktivnostima vezanim za prijem Bosne i Hercegovine u nestalno članstvo u Vijeću sigurnosti Ujedinjenih naroda (osnova za raspravu – informacija Ministarstva vanjskih poslova BiH: Aktivnosti vezane za prijem BiH u Vijeće sigurnosti UN-a, dostavljena PSBiH 17. 2. 2009.), kao i Informaciji o aktivnostima vezanim za prijem BiH u Vijeće sigurnosti Ujedinjenih naroda 2010. - 2011. godine (osnova za raspravu: Plan rada Koordinacionog tima za vođenje kampanje za nestalno članstvo Bosne i Hercegovine u Vijeću sigurnosti 2010. – 2011. godine, dostavljen PSBiH 4.2.2009.), te na osnovu toga utvrđivanje prijedloga člana Koordinacionog tima u ime PSBiH za kandidaturu BiH u Vijeće sigurnosti UN-a

Ambasador Miloš Prica pozvao je Parlamentarnu skupštinu BiH da imenuje člana Koordinacionog tima za kandidaturu BiH u Vijeće sigurnosti UN-a dodavši da jedino PSBiH nije imenovala člana Koordinacionog tima. Kazao je da bi to trebala da bude osoba koja ima dodira sa strancima, sa stranim delegacijama kako bi lobirala za naše članstvo u Vijeću sigurnosti. On je zamolio Komisiju da ovo ne shvata formalno i dodao da je potrebna osoba koja će također biti zadužena za razmjenu informacija između Koordinacionog tima i Parlamentarne skupštine BiH.

Sadik Ahmetović predložio je predsjedavajućeg Predstavničkog doma PSBiH.

Slavko Matić spomenuo je Mladena Ivanića, Azru Hadžiahmetović i Milicu Marković kao osobe koje bi mogle obavljati taj posao.

Na kraju je usaglašeno da se obaveza imenovanja člana Koordinacionog tima vrati Kolegiju s mišljenjem Komisije da bi to mogao raditi i predsjedavajući Predstavničkog doma PSBiH Beriz Belkić.

Ad. 5. Razmatranje Orijentacionog radnog plana Komisije za vanjske poslove u 2009. godini

Slavko Matić predložio je da se ova tačka uvrsti u dnevni red sljedeće sjednice Komisije.

Ad. 6. Izvještaji i materijali pristigli na Komisiju:

- **Zabilješka s drugog sastanka Koordinacionog tima za vođenje kampanje za članstvo BiH u Vijeću sigurnosti UN-a za period 2010. - 2011. godina, održanog 16. 2. 2009. (materijal MVP-a BiH);**
- **Informacija o održavanju okruglog stola o proširenju vojno-političkih obaveza BiH u okviru UN-a i OSCE-a, Sarajevo, 11. i 12. 3. 2009. (materijal MVP-a BiH);**
- **Informacija o planiranju posjete Grupe prijateljstva PSBiH Republici Sloveniji - (materijal MVP-a BiH);**
- **Informacija o posjeti generalnog konzula BiH Parlamentu Baden-Wuettemberga, (materijal MVP-a BiH);**
- **Informacija o sastanku delegacije Narodne skupštine RS-a s predstavnicima parlamenata Brisela i Flamanije (materijal MVP-a BiH);**
- **Informacija o posjeti ministra vanjskih poslova Francuske Bernarda Kouchnera Bosni i Hercegovini, 9. i 10. 4. 2009. (materijal MVP-a BiH);**
- **Dogovor o terminu i sastavu delegacije Komisije za vanjske poslove za uzvratnu posjetu Parlamentu Estonije.**

Komisija je primila k znanju informacije iz ove tačke dnevnog reda.

Komisija je također upoznata s predloženim terminom za uzvratnu posjetu Parlamentu Estonije od 18. do 22. 5. 2009.

Sjednica je završena u 16,45 sati.

Zapisnik sačinio:

Miroslav Stanišić, stručni saradnik u Komisiji za vanjske poslove.

Sekretar Komisije

Merdžana Iglica

Predsjedavajući Komisije

Slavko Matić

Kopija MVP-u BiH